

Nunat avannarliit killiit akornanni inuusuttut piffissami aalajangersimasumik killilikkami aalajangersimasumik akikitsumik akeqartillugu angalasinnaangortillugit aaqqissuussinermik ”interrail’itut” ittumik pilersitsisinnaanermik – imaluunniit allatut assersuutigalugu angalanermut tapiissutinik legatinik pilersitsinikkut nunat avannarliit killiit inuusuttunut ammaannissaannut periarfissanik misissueqqullugit Nunat Avannarliit Killiit Siunnersuisoqatigiiffiata Savalimmiuni, Kalaallit Nunaanni aamma Islandimi Naalakkersuisut kaammattorpai.

(Aallartitat siulittaasuat Vivian Motzfeldt)

Akissuteqaat

(Ineqarnermut Attaveqaqatigiinnermullu Naalakkersuisoq)

Siullermeerneqarnera

Aallarniutigalugu Naalakkersuisuniit Aallartitat Siulittaasuat Vivian Motzfeldt, Siumut, aalajangiiffigissatut siunnersuuteqarnerani qutsavigaarput.

Naalakkersuisut siunnersuuteqartoq tunngaviusumik isumaqatigaat, tassalu nunani killerni avannarlerni inuusuttut akunnerminni kulturit misigisariaqarpaat. Ataqtigiinneq, suleqatigiinneq attaveqaqatigiinnerlu nunat akornanni naleqartitani, nunat killeqarfii akimorlugit pitsaasumik attaveqaqatigiinnissaq qulakkeerniarlugu attatiinnartariaqartuni pingaarutilittut inissisimapput.

Taamaattumik Nunat Avannarliit Killiit Siunnersuisoqatigiiffiata inerrail-itut ittumik aaqqissuussinissaq pillugu isumassarsiaa suliniutaavoq pissanganartoq, tunngaviusumik Naalakkersuisunit misissuiffigineqarusussinnaasoq.

Kisiannili COVID-19-ip nunarsuarmi manna tuniluunnerata kingunerisaanik, Nunap Karsianut silaannakkullu angallassinermut aningaasaqarnermut sunniutit atuuttut erseqqissaatiginissaat Naalakkersuisunut pingaaruteqarpoq.

Silaannakkut angallassinermi ajornartorsiorfiusumi akikillisaasiisarnerit atuutsinneqalernissaat aningaasasaqartinneqanngippat, tapersiisarneq Nunap Karsiata aningaasartuuteqarnerulerneranik kinguneqartussaavoq. Kiffartuussinermut isumaqatigiissutit nutaat, kulturimut tapersiissutit aningaasaliissutit imaluunniit angalanissanut aningaasaateqarfinnut akileeqataassutissatut aningaasaliissutit assigisaalluunniit, kiisalu taakku aqunneqarneri aningaasartuuteqarfigineqassapput.

Piffissami ajornartoorfiusumi inuiaqatigiit aningaasaqarnerat eqqarsaatigalugu Naalakkersuisut ataatsimiinnermi matumani taamaallaat siunnersuutinik aningaasartuuteqarfiusariaqartunik pisariaqarnerpaaginnarnik saqqummiussiniarput.

Aaqissuussineq interrail-itut ittoq pillugu siunnersuut misissuiffigineqassapat, aningaasaliissutissanik immikkoortitsisoqartariaqarpoq.

Siunnersuut pitsaasuugaluartoq, misissuinissamut ajornartoornerup qaangiunnissaata utaqqineqarnissaa, taamaalillunilu piffissami ajornartoorfiusumi siunnersuutini aningaasartuuteqarfiusariaqartunik aallartitsisoqannginnissaa Naalakkersuisunit inassutigineqarpoq.

Tamanna pissutigalugu siunnersuutip akuersissutigineqarnissaa, aammalu ajornartoorneq qaangiuppat suliniutillu ingerlannissanut aningaasassaartoqalerpat suliassap aallartinneqarnissaa Naalakkersuisut inassutigaat.

Matumuuna aalajangiiffigisassatut siunnersuut Inatsisartuni kajumittumik suliassanngorlugu tunniuppara.